

金詩紀事

一

PL
2533
.C4j
v.1

YORK UNIVERSITY

JUN 5 - 2001

1007 ADAM STREET

金詩紀事


李宜麟著

2533
-C4j
v.1

YORK UNIVERSITY
JUN 5 - 2001
EAST ASIAN STUDIES

金詩紀事

李宜龍署



Digitized by the Internet Archive
in 2010 with funding from
York University Libraries

金詩紀事敘

嗚呼遼金元之詩。胡爲而有於吾中國哉。阿保機興。而石晉兒於遼。遼有中國之一隅。阿骨打興。而趙佶父子虜於金。金有中國之半。鐵木真興。而趙鼎兄弟降於元。湛於元。元乃統有中國之三國之遞相吞滅。亦具以燼矣。獨吾中國之文獻。一爲所尸。遂終古而不可復。於金則尤有可痛者。方人也。以亡命逋逃於金。旣駸駸嚮用矣。徒以不忘祖國。漏師於候館。事泄遭烹。韓璘與司馬通國。聶山等。謀歸宋。遇害至三百餘口。宇文太孥與吳深州。前後奉使被留。爲洪忠宣可也。爲庾開府亦可也。宇文氏以欲爲曹沫。致湛家族。辛幼安幸而獲南。張孝純則不幸誤陷僞齊矣。夫人非負有謀人軍師謀人邦邑之重。一旦神州陸沉。誰執其咎。必盡人責其爲伯夷叔齊。不餐周粟乎。至

撫時感事。比於秋蟲春鳥之自鳴。必盡人繩以采薇之歌。以暴易暴之語乎。秦風之小戎駟鐵。楚騷之香草美人。庸可以秦楚而斥之邪。完顏氏崛起於朔方。海陵之立馬吳山。氣概不亞於三侯。道陵所自出。爲宋道君。明昌泰和間。文物嗜好。酷似宣和。而中原之故家老成。流風未沫。故遺山中州一集。大有俯視吳儂之意。虞伯生欲輯南州集以抗之。恐亦未操勝算也。遺山爲拓跋苗裔。野史一亭。原以金源文獻自任。史旣未成。聊都此集。表章百年來文人。惜所舉似。率近體斷句。寫景詠物之作居多。無大關繫者。又限於生存人不得入選。用是金末作者。遺漏尙夥。今金代別集總集。流傳者不及十種。將毋中外正閏之分。保存者少邪。然所有名大家傳作。散見他書者。猶足肩隨元人。視元人之媚茲一人。扈從應制之作爲少。而終留遺山一老。感

虞虢於眼中。望宋州蔡州而涕下。完顏氏之末路。不視遼元而重可
哀邪。柔兆困敦如月八十一。叟衍自序

金詩紀事凡例

一金人上承遼宋、以仕金不仕金爲斷、其在野者、以所隸版圖爲斷、易於分別也、元遺山中州集、至以滕奉使茂實、朱奉使弁闌入、則失斷限矣、今不從、

一金代詩人、多出科舉、自以科第先後爲次第、其無科第者、略以友朋輩行爲標準、惟金初科第未盛、先以遼宋降人、太宗朝人及僞齊人爲一卷、次以熙宗海陵王兩朝人爲一卷、又次以世宗大定閒人爲一卷、又次以世宗明昌承安泰和閒人爲一卷、又次以衛紹王朝人爲一卷、又次以宣宗哀宗兩朝人爲一卷、又次以金末無科第人、及科第時代無考者爲一卷、

一金人下接元代、則有難於斷限者、金末詩人多不仕、其入元尙

存與否、頗難細考、元詩紀事中、如員炎、撒彖、鄭雲表等、本在可金可元之列、業已入元、則亦聽之、女冠元氏、遺山之妹、當入金詩、然求婚之張平章、未審其爲金人爲元人、入元雖似有誤、亦只得仍之、

一編纂詩紀事體例、本有遺老一門、可將前代詩人收入、以光篇幅、故舊纂元詩紀事、於金詩人若遺山、莊靖輩、已將其有事之詩、編入遺老門、今編金詩、斷不能將本朝詩中巨子、反付闕如、乃於遺山傳作、關繫宗社存亡、身世危苦、凡一切未入元詩紀事者、悉爲編入、其已入元詩紀事、如箕山、琴臺論詩絕句之類、最表著者、不下數十篇、皆不重收、其他家傳作甚少者、不能不重見一二、則後漢書之傳劉表、孔融等、不嫌其已見三國志、蓋

范書本居主位也、

金詩紀事總目

卷一

廢帝

世宗

顯宗

章宗

卷二

宮闈

李宸妃

卷三

宗室

完顏璫

完顏匡

完顏奉國

卷四

虞仲文

左企弓

張通古

王樞

孫九鼎

魏道明

楊用道

杜充

甯鑒

翟欽甫

張斛

祝簡

朱之才

宇文虛中

韓璘

高士談

施宜生

馬定國

鮮于可中

高鵬化

王景徽

吳縝

卷五

吳激

蔡松年

姚孝錫

晁會

李晏

朱自牧

董師中

鄭子聃

劉瞻

劉汲

王寂

邊元鼎

趙述

孔彥舟

高公振

任詢

郝俛

杜佺

劉仲伊

卷六

耶律履

孟宗獻

許安仁

郭用中

趙文昌

党懷英

楊廷秀

孫鐸

劉迎

周馳

王庭筠

王明伯

趙運鼎

田特秀

劉昂

呂造

蕭貢

趙秉文

王修齡

李天英

高汝礪

胥鼎

朱瀾

劉仲傑

卷七

楊雲翼

韓玉

張建

張檝

酈權

田琢

趙思文

張翥

張在

趙颯

周昂

王若虛

王良臣

元德明

李俊民

范中

李純甫

白賁

卷八

劉從益

郝天挺

移刺霖

劉昂霄

辛愿

王鬱

冀禹錫

雷淵

劉澤

康錫

呂大鵬

元好古

田紫芝

李夷

潘仲明

王彥

英

卷十三

閨閣

張秦娥

馮氏婦

李氏

卷十四

無名子

題韓魏公祠句 嘲奔附劉豫詩 題壁 嘲王澤民呂造 送孫鐸

卷十五

雜歌謠諺識語

正隆童謠

明昌童謠

趙秉文時人語

河南令正平令諺

泰和童謠

貞祐童謠

括粟榜文

石碣詩

興定童謠

浙川木中詩

詛祝歌

卷十六

仙鬼

楊真君


宋宮人玉真

古仙人辭

金詩紀事卷一

侯官陳衍緝

廢帝



廢帝名亮字元功本諱迪古太祖長子遼王宗幹第二子弒熙宗而篡其位後伐宋將渡江爲浙西兵馬都統制叛兵所弒太定二年降封海陵郡王諡曰煬後廢爲海陵庶人

大金國志天德四年冬燕京新宮成主率文武百官自會寧府遷都於燕貞元元年元夕張燈宴丞相以下於新宮賦詩縱飲盡歡而罷

中興禦侮錄海陵一日發楊州望江亭指顧江山之勝謂其下曰朕不入浙誓不返國因改其亭曰不歸臺賦詩云云蓋

不歸之識已先見之矣

夷堅志建康歸正官王和尚濟南人能誦金主亮小詞其詠
雪昭君怨曰昨日樵村漁浦今日瓊川玉渚山色捲簾看老
峯巒錦帳美人貪睡不覺天花剪水驚問是楊花是蘆花

南征至維揚望江左

一作西湖題圖

萬里車書盡會同江南豈有別疆封屯

一作提

兵百萬西湖上立馬吳

山第一峯

歸潛志海陵庶人正隆南征至維揚望江左賦詩云云其志
氣亦不淺

程史金主未立封岐王爲平章政事頗知書好爲詩詞語出
輒崛彊悠悠有不爲人下之意境內多傳之其居位時好文

辭猶不輟將圖南牧遣施宜生來賀天申節隱畫工於中使
圖臨安之城邑及吳山西湖之勝以歸旣進繪事大喜矚然
有垂涎杭越之想亟命撤坐閒軟屏更設所獻而於吳山絕
頂貌己之狀策馬而立題其上云云遷汴之歲中秋舉杯待
月不至賦鵲橋仙云停杯不舉停歌不發等候銀蟾出海不
知何處片雲來做許大通天障礙髭髯撚斷星眸睜裂惟恨
劍鋒不快一揮截斷紫雲腰仔細看嫦娥體態明年竟遂前
謀使御前都統驃騎衛大將軍韓夷耶將射雕軍二萬三千
圍子細軍一萬先下兩淮臨發賜所製喜遷鶯以爲寵曰旌
麾初舉正駢騄力健嘶風江渚射虎將軍落鵬都尉繡帽錦
袍翹楚怒磔戟髯爭奮捲地一聲鼙鼓笑談頃指長江齊驟

六師飛渡此去無自墮金印如斗獨把功名取斷鎖機謀垂
鞭方略人事本無今古試展臥龍韜韞果見成功旦莫問江
左想雲霓望切玄黃迎路余又嘗問開禧降者能誦憶尙多
不能盡識觀其所存寓一二於千百其桀驚之氣已溢於辭
表他蓋可知也軟屏詩正隆事迹以爲翰林修撰蔡珪所作
詭曰御製反覆他作似出一機杼或者傳疑益訛抑其餘皆
出於視草亦無所致詰錄所見者聊以寓志怪云

金小史初金主亮遣施宜生往來爲賀正使密寫臨安之湖
山以歸已自有南窺之意及亮與幸臣梁漢臣遊宮中聞人
唱柳耆卿望海潮曲皆錢塘景物亮問之曰適唱何調答曰
望海潮梁漢臣曰此神仙詞也時孔彥舟進木犀一株亮喜

梁漢臣曰此花乃江南植以爲薪於是亮問朝中誰曾往江南梁漢臣曰有兵部尙書胡隣曾到遂召之首問錢塘隣曰臣使江南揚州瓊花潤州金山平江姑蘇錢塘西湖尤爲天下美觀其地更有多多美景但臣迹不得到只此數景天下已罕况於他乎亮聞之大喜遂決意南征

鶴林玉露孫何帥錢塘柳耆卿作望江潮詞贈之云東南形勝三吳都會錢塘自古繁華煙柳畫橋風簾翠幙參差十萬人家雲樹繞隄沙怒濤卷霜雪天塹無涯市列珠璣戶盈羅綺競豪奢重湖疊巘清佳有三秋桂子十里荷花羌管弄晴菱歌泛夜嬉嬉釣叟蓮娃千騎擁高牙乘醉聽簫鼓吟賞煙霞異日圖將好景歸去鳳池誇此詞流播金主亮聞歌欣然

有慕於三秋桂子十里荷花遂起投鞭渡江之志近時謝處厚詩云誰把杭州曲子謳荷花十里桂三秋那知卉木無情物牽動長江萬里愁余謂此詞雖牽動長江之愁然卒爲金主送死之媒未足恨也

案以上三筆記皆言金亮圖南事然互有異同互有詳略悉載之其始末乃備云

句

大柄若在手清風滿天下

歸潛志海陵庶人爲藩王時嘗書人扇云云人知其大志

世宗

世宗諱雍本諱烏祿太祖孫改元大定在位二十九年

金史贊世宗躬節儉重農桑家給人足號小堯舜

大金國志四月三日金主與太子諸王在京苑賞牡丹晉王
允猷賦詩以陳和者十五人完顏偉兀朮子探知其意直前
頓首言曰國家君臣將帥皆以勇力戰爭雄略故能滅遼宋
混一南北諸番畏懼自近年多用遼宋亡國遺臣以富貴文
字壞我土俗先臣昔在順昌爲劉錡所敗便歎用兵已不如
天會時皆是年來貪安漸爲人侮今皇帝旣一向不說着兵
使說文字人朝夕在側遺宋所傳之主是有志報復今朦骨
不受調役夏人亦復侵邊陛下舍戰鬪之士謂其不足與語
不知三邊有急把作詩人去當得否主默然左右皆駭目相
顧知內省事余萬福向前扶之曰皇帝方歡飲郎君却作苦

惱人耶扶起去之自是文武分黨如冰炭矣

本朝樂曲

猗歟我祖聖矣武元誕膺明命功光於天拯溺救焚深根固蒂克開
我後傳福萬世無何海陵淫昏多罪反易天道荼毒海內自昔肇基
至於繼體積累之業淪胥且墜望戴所歸不謀同意宗廟至重人心
難拒勉副樂推肆予嗣緒二十四年就業萬幾億兆庶姓懷保安綏
國家閒暇廓然無事乃眷上都興帝之第屬茲來游惻然予思風物
減耗殆非昔時於鄉於里皆非初始雖非初始朕自樂此雖非昔時
朕無異視瞻戀慨想祖宗舊宇屬屬音容宛然如覩童嬉孺慕歷歷
其處壯歲經行恍然如故舊年從游依稀如昨歡誠契闊旦莫嗟若
於嗟闊別兮云胡不樂

金史大定二十五年四月帝幸上京宴宗室於皇武殿飲酒
樂上諭之曰今日甚欲成醉此樂不易得也昔漢高祖過故
鄉與父老歡飲擊筑而歌令諸兒和之彼起布衣尙且如是
況我祖宗世有此土今天下一統朕巡幸至此何不樂飲於
是宗室婦女起舞進酒畢羣臣父老起舞上曰吾來故鄉數
月矣今廻期已近未嘗有一人歌本曲者汝曹來前爲汝歌
乃命宗室子叙坐殿下者皆上殿面聽上歌曲道祖宗創業
艱難及所以繼述之意上既自歌至慨想祖宗音容如覩之
語悲感不復能成聲歌畢泣下數行右丞相元忠暨羣臣宗
戚捧觴上壽皆稱萬歲於是諸老人更歌本曲如私家相會
暢然歡洽上復續調歌曲留坐一更極歡而罷

顯宗

顯宗諱允恭本諱胡上瓦世宗第二子章宗父世宗立爲皇太子未卽位而崩

金史世紀補世宗卽位封楚王置官屬賜名允迪專心學問與諸儒講議於承華殿

宋濂題金顯宗所畫墨竹允恭興陵嫡子大定二年立爲皇太子二十六年八月崩其子道陵紹位追諡十字帝號而廟曰顯宗

湛然居士集顯宗在東宮時嘗讀東坡鐵拄杖詩因召侍臣鄭子聃問杖之存亡子聃以在睢陽爲對因以數千緡購於張文定公孫其孫藏於屋棟子聃竟不得一見云

書石右相琚生日之壽

黃閣今姚宋青宮舊綺園繡絺歸里社冠蓋畫都門善訓懷師席深
仁寄壽尊所期河潤溥餘福被元元

中州集嚴永濬序光孝在儲位二十餘年事興陵能承意開
導四方陰受其賜所謂餘福被元元者嘗於賜宰相壽日詩
見之

風箏

心與寥寥太古通手隨輕籟入天風山長水闊無尋處聲在亂雲空
碧中

中州集原註此詩山陽民家有上御書無篇題不知何人作
及見唐高駢賦風箏云夜靜絃聲響碧空宮商信在往來風

依稀似曲才堪聽又被移將別調中乃知上所書蓋風箏詩而又次駢韻者也姑存之以俟更考

章宗

章宗諱景小字麻達葛顯宗嫡子在位十九年改元明昌承安泰和

癸辛雜識金章宗之母乃徽宗某公主之女也故章宗凡嗜好書劄悉效宣和字畫尤爲逼真金國之典章文物惟明昌爲盛

書史會要章宗喜作字專師宋徽宗瘦金書

太平清話金章宗蓬萊院內宴時所陳玉器及諸玩好視其篆識多宣和物

秋澗集慶壽精藍丈室之前松樾盈庭景色蕭爽嘗引流水
貫東西梁今水堙橋廢止存二石屏上刻飛渡橋飛虹橋六
字筆力遒勁勢極飛動有王禮部無競風格寺中相傳金道
陵筆也

宮中絕句

五雲金碧拱朝霞樓閣崢嶸帝子家三十六宮簾盡捲東風無處不
楊花

命翰林待制朱瀾侍夜飲詩

夜飲何所樂所樂無喧譁三杯淡醕醪一曲冷琵琶坐久香成穗夜
深燈欲花陶陶復陶陶醉鄉豈有涯

歸潛志章宗天資聰悟詩詞多有可稱者其宮中絕句及命

翰林待制朱瀾侍夜飲詩眞帝王作也嘗爲鐵券行數十韻
筆力甚雄又有送張建致仕歸弔王庭筠下世詩具載飛龍
記中

雲龍川泰和殿五月牡丹

洛陽穀雨紅千葉嶺外朱明玉一枝地力發生雖有異天公造物本
無私

大金國志承安四年二月詔建太學於京城之南總爲屋七
十有五區西序置古今文籍祕省新所賜書東序置三代鼎
彝俎豆敦盤尊壘及春秋釋奠合用祭器於是行禮於辟雍
祀先師孔子召郡國學生通一經以上者居之公卿以下子
孫並入學受業每季臨觀課其優劣學徒甚盛諸生獻詩頌

文賦者四百人國主博學工詩曾於雲龍川泰和殿賞牡丹
詠詩云時五月初也

仰山

燕京西北十里仰山峯巒拱秀中有平頂如蓮花心旁有五峯曰獨秀翠微紫蓋妙高紫微下多禪刹章宗游幸

有詩
刻石

金色界中兜率景碧蓮花裏梵王宮鶴驚清露三更月虎嘯疎林萬
壑風

長安可游記下黃牛岡口取仰山道轉一岡爲南莊復歷峻
坂土中有三斷石讀之乃知爲大興府西連山棲隱寺金大
定初建有五峯八亭章宗屢游之嘗題詩刻石今亡矣

句

從今畫錦蓮峯下三樂休誇榮啓期

中州集蘭泉張建應奉翰林文字以老乞身道陵愛其淳不
欲令去左右眷眷久之超同知華州防禦使事仍賜詩有云
云之句士林榮之

金詩紀事卷二

宮闈

侯官陳衍緝

李宸妃

金史后妃傳章宗元妃李氏師兒大定末以監戶女子入宮
是時宮教張建教宮中師兒與諸宮女從之學故事宮教以
青紗隔障蔽內外不得面見有問自障內映紗指字以請宮
教自障外口說教之諸女子中惟師兒易爲領解建不知其
誰但識其音聲清亮章宗問建女子誰可教者建對曰就中
音聲清亮者爲最章宗以建言求得之宦者梁道譽師兒才
美勸章宗納之章宗好文詞妃性慧黠能作字知文義尤善
伺候顏色迎合意旨遂大愛幸明昌四年封昭容明年進封

淑妃已進封元妃

粧臺聯句

二人土上坐一月日邊明

金臺集妝臺李妃所築今在昭明觀後妃嘗與章宗露坐上
得句妃應聲云云

金詩紀事卷三

宗室

侯官陳衍緝

完顏璫

璫字子瑜章宗諸孫明昌初封公衛紹王時除開府儀同三司宣宗時封胙國公哀宗正大初進密國

遺山集自明昌初鎬厲等二王得罪後諸王皆置傅與司馬府尉文學名爲王府官屬而實監守之府門啓閉有時王子若孫及外人不得輒出入出入皆有籍訶問嚴甚金紫若國公雖大官無所事事止於奉朝請而已密公班朝著者如是四十年初燕都遷而南危急存亡之際凡車輅宮縣寶玉祕器所以資丕天之奉者舟車輦運國力不贍至汴者千之一

耳而諸王公貴主至有脫身而去者公家法書名畫連箱累
篋寶惜固護與身存亡故他貨一錢不得著身方遷革倉卒
朝廷止以乏軍興爲憂百官俸給減削幾盡歲日所入大官
不能贍百指而密公又宗室之貧無以爲資者其落薄失次
爲可見矣元光以後王薨門禁緩文士稍遂款謁然亦不過
三數人而止矣公資稟簡重而至誠接物不知名爵爲何物
少日師三川朱巨觀學詩龍巖任君謨學書真積之久遂擅
出藍之譽於書無所不讀而以資治通鑑爲專門馳騁上下
千有三百餘年之事其善惡是非得失成敗道之如目前穿
貫他書考證同異雖老於史學者不加也名勝過門明窗棐
几展玩圖籍商略品第顧陸朱吳筆虛筆實之論極幽眇及

論二王筆墨推明草書學究之說窮高妙而一言半辭皆可
紀錄典衣置酒或終日不聽客去爐薰茗椀或橙蜜一杯有
承平時王家故態使人愛之而不能忘也

歸潛志字仲寶自號樗軒居士造其第一室蕭然琴書滿案
晚自刊其詩三百首樂府一百首號如菴小橐趙閒閒序之

自題寫真

枯木寒灰亦自神應緣來現昨公身只緣苦愛東坡老人道前身趙
德麟

自戲

借來羸馬鈍於牆馬上官人病且痊無用老臣還有用一年三五度
燒香

遣山集字畫得於蘇黃之間參禪於善西堂名曰祖敬自題
寫真有云云之句舊制國公祭山陵則佩虎符乘傳號曰嚴
祭若上清儲祥宮若太乙宮五嶽觀設醮上方相藍大道場
則國公代行香公多預焉又有詩自戲云云蓋實錄云公詩
五卷號如菴小橐者汴梁鬻書家有之樂府云夢到鳳凰臺
上山圍故國週遭又云咫尺又還秋也不成長似雲閑識者
聞而悲之予竊謂古今愛作詩者特晉人之自放於酒耳吟
咏情性留連光景自當爲緩憂之一物在公則又以之遯世
無悶獨立而不懼者也

完顏匡

匡本名撒速世祖九世孫充章宗教讀

睿宗功德歌

我祖睿宗厚有陰德國祚有傳儲嗣當立滿朝疑懼獨先啓策徂征
三秦震驚來赴富平百萬望風奔仆靈恩光被時雨春暘神化周浹
春生冬藏

金史顯宗命匡作睿宗功德歌教章宗歌之二十三年三月
萬春節顯宗命章宗歌此詞侑觴世宗愕然曰汝輩何因知
此顯宗奏曰臣伏讀睿宗皇帝功德欲使兒子知創業之艱
難命侍讀撒速作歌教之世宗大喜顧謂諸王侍臣曰朕念
睿宗皇帝功德恐子孫無由知皇太子能追念作歌以教其
子嘉哉盛事朕之樂豈有量哉卿等亦當誦習以不忘祖宗
之功命章宗歌數四酒行極歡乙夜乃罷

完顏奉國

奉國官華州防禦使

書蒲城壁

閱兵肄武躍驂騑仰視蓮峯睨碧流縱是邊陲狼燼滅暫喧鉦鼓角
聲幽如貔似虎威風銳積玉堆藍爽氣浮木老君恩須重報終焉更
卜隱巖陬

蒲城志奉國練軍太華山陰有書蒲城壁詩云云

金詩紀事卷四

侯官陳衍緝

虞仲文

仲文字質夫武州寧遠人第遼進士仕爲遼相降金授樞密使平章政事封秦國公

雪花

瓊英與玉蘂片片落前池問著花來處東君也不知

續夷堅志虞令公仲文四歲賦雪花詩仕遼爲相

圖繪寶鑑四歲作詩賦煎餅有魚目蟬聲之句人以神童目之仲文善畫人馬墨竹學文湖州

左企弓

企弓字君財薊州人中遼進士官至同中書門下平章事知樞密院事遼亡降金俾復舊職守太傅中書令被殺於張覺諡恭烈贈特進濟國公

句

君王莫聽捐燕議一寸山河一寸金

金史太祖既定燕從初約以與宋人企弓獻詩略云云太祖不聽

馬擴茅齋自敍女真得契丹故大臣皆言南朝自來畏怯又見劉延慶敗走左企弓上阿骨打詩云云故有敗盟之意南使過盧溝河卽焚橋梁

張通古

通古字樂之易州易縣人遼天慶二年登進士第後仕金至平章政事封鄆王正隆初以司徒致仕封曹王

金史讀書過目不忘該綜經史善屬文金割燕京與宋宋人欲收人望召之通古辭謝隱居太寧山下後仕金

靈壁寺詩

萬壑千巖裏林開一徑深數年勞想望此日快登臨勝境情難盡危塗力不任樓臺相映抱松柏自蕭森花散諸天雨燈傳古佛心鶴泉寒漱玉園地舊鋪金石磴崎嶇上桃谿窈窕尋淵明能止酒叔夜况攜琴所恨無長暇徒勤惜寸陰清宵誰我伴乘興但孤斟

案遼文存收入此詩今錄此正之

王樞

樞字子慎良鄉人

三河道中

十載歸來對故山山光依舊白雲閒不須更讀元通偈始信人閒是夢閒

中州集遼日登科後仕國朝直史館嘗有三河道中詩云云

孫九鼎

九鼎字國鎮忻州定襄人天會六年經義第一人

遊金明

片片桃花逐水流東風吹上木蘭舟隔溪紅粉休相認年少孫郎不姓劉

中州集在太學時遊金明作詩云云弟九疇億俱有時名三

人同榜登科

魏道明

道明字元道易縣人第進士官至安國軍節度使

句

燕來燕去烏衣巷
花落花開穀雨天
碧海半彎蝸角國
春風十里鴨頭波
月桂知經幾寒暑
冰壺別是一山川

中州集莫年居雷溪自號雷溪子有鼎新詩話行世春興云
云高麗館偏涼亭云云中秋云云其所得者也

楊用道

用道長山人仕至中奉大夫

題懷范樓

初十一作

載希文此屈盤

蟠一作

天衢一旦遂高搏古人直許到夔契當

世猶能並富韓事與陶朱均日

終古一作

煥名彰

將一作

長白倚天寒何但

東坡爲流涕遺編我讀亦洊瀾

石刻拓本王國器跋楊用道懷范樓詩故海寧刺史楊中奉
才學與蘇黃上下近於李舜臣家得公筆跡慮其湮沒命工
勒石以傳永久泰和乙丑□□日宣武將軍行主簿騎都尉
王國器立石

杜充

充字公美相州人仕宋知滄州歸金拜尙書右丞相領中山
行臺

石席

溪石齒齒溪水潺潺鳴玉跳珠水流石閒娟娟溪月冷冷溪風風吟
松梢月湛林中欲醉而歌既醉而臥悠悠千古浮雲之過

劉祁遊林慮西山記厓北轉有大石方丈餘雪瑩掌平枕溪
號石席上刻杜相公美所作銘云云

甯鑒

鑒字晦之固安人登進士第官至忠軍副使

句

天下餒寒弃我意

虞仲文撰甯鑒墓志拓本初舉進士同輩有吟風雪夜縱酒
詩君獨有云云之句虱在布衣其志亦已遠矣

翟欽甫

堯山堂外紀翟欽甫金初人

清庵

爲問清庵何以清霜天明月照蓬瀛廣寒宮裏琴三弄白玉樓頭笛
一聲金井玉壺秋水冷石田茅屋暮雲平夜來一枕遊仙夢十二瑤
臺獨自行

瑞桂堂暇錄翟欽甫金人也衆飲清菴欽甫至衆不之識俾
賦清菴欽甫故拙起一句衆拍手大笑及賦二句衆失色連
賦云云衆始知爲欽甫愧謝延之上坐

張斛

斛字德容漁陽人仕宋爲武陵守金初北歸官祕書省著作
郎有南游北歸等集

句

天圍秋漲闊山背夕陽孤岸樹晴猶濕汀煙近却無山孤雲開千里

月風動一天星巫山對月細草沙邊樹疏烟嶺外村河池出郭緣漲他山雨青

浮近市烟中江縣樓月色四時好人心此夜偏中秋春木有秀色野雲無俗

姿松門峽晴光搖碧海遠色帶滄洲賦禮部侍郎張浩然遼海亭雨聲喧暮島水色

借秋空瀟亭碣石晚風催雁急昭祁寒漲與雲平秋興樓

中州集如云云人多誦之予嘗見其文筆字畫皆有前輩風

調字文大學甚激賞之

祝簡

簡字廉夫單父人金初倖某州官至太常丞兼直史館有鳴

鳴集

雪屋無寒夢油燈有細香 白髮渾無賴朱顏更不回 遮眼細書聊引睡扶頭濁酒最關情

中州集廉夫詩甚工如賦雪云云書懷云云此類甚多

朱之才

之才字師美洛西三鄉人宋崇寧閒登科入齊爲諫官坐直言黜爲泗水令

句

魯甸分鴻影齊山入馬蹄 門靜堪羅雀書成不換鵝 雨過好花紅帶潤日長嘉樹綠移陰

中州集自號慶霖居士有霖堂集如云云此類甚多

宇文虛中

虛中字叔通益州廣都人宋大觀二年進士建炎初以資政
殿學士充祈請使留金爲翰林學士紹興中謀劫金主事泄
全家皆死淳熙初宋贈開府儀同三司諡肅愍

在金日作三首

滿腹詩書漫古今頻年流落易傷心南冠終日囚軍府北雁何時到
上林開口摧頽空抱朴脅肩奔走尙腰金莫邪利劍今安在不斬姦
邪恨最深

遙夜沈沈滿幙霜有時歸夢到家鄉傳聞已築西河館自許能肥北
海羊回首兩朝俱草莽馳心萬里絕農桑人生一死渾閑事裂眚穿
胸不汝忘

不堪垂老尙蹉跎有口無辭可奈何強食小兒猶解事學妝嬌女最

憐他故衾媿見霑秋雨短褐寧忘拆海波倚杖循環如可待未愁來日苦無多

北窗炙輠云宇文虛中在金作三詩所謂人生一死渾閑事云云豈李陵所謂欲一效范蠡曹沫之事後虛中仕金爲國師遂得其柄令南北講和大母獲歸往往皆其力也近傳明年八月閒果欲行范蠡曹沫事欲挾淵聖以歸前五日爲人告變虛中覺有警急發兵直至金主帳下金主幾不能脫遂爲所擒嗚呼痛哉實紹興乙丑也審如是始不負太學讀書耳

題平遼碑

十丈豐碑勢倚空風雲猶憶下遼東百年功業秦皇帝一代文章太

史公石斷雲鱗秋雨後苔封鼃背夕陽中行人立馬空惆悵禾黍離離滿故宮

春明夢餘錄平遼碑立燕都豐宜門外史臣韓昉撰文字文虛中書舊有詩云云韓昉燕京人

句

閨里共驚新素髮兒童重整舊斑衣

金節要張孝純守太原而破執至粘罕前粘罕曰秋當還公於鄉里至遣人送南歸只云歸鄉而已故奉使宇文虛中送孝純詩有云云句孝純既至河閒欲由濟南歸徐主者曰當與公共至東平節制司某得回檄公方可歸徐至汶上劉豫已僭位遽有拜相之命

韓璘

璘金人紹興中歸宋不果遇害

題扇寄弟

嚙嚙鳴雁落江濱夢裏年來相見頻吟盡楚辭招不得夕陽愁殺倚樓人

四朝聞見錄司馬文季使北不屈在北生子名通國字武子蓋本蘇武之意通國有大志嘗結北方之豪韓玉舉事未得要領紹興初玉挈家而南授江淮都督府計議軍事其兄璘在北亦與通國善癸未九月以扇寄玉詩云云都督張魏公見此詩甲申春遣侯澤往大梁諷璘通國等至亳州爲邏者所獲通國璘與常所與交聶山等三百餘口同日遇害是歲

三月十六日也

高士談

士談字子文一字季默宋韓武昭王瓊之後宣和末任忻州
戶曹仕國朝爲翰林直學士皇統初預宇文大學之禍有蒙
城集行於世

楊花

來時官柳萬絲黃去日飛毬滿路旁我比楊花更飄蕩楊花只是一
春忙

中州集此詩亦嘗載橘林集中然子文集是其子特夫手錄
恐無悞收者故從之

句

寒花貪晚日瘦竹強秋霜 可憐風雨胼胝苦後世山河屬外人

禹廟

中州集如云云時人悲之子公振字特夫亦有詩名

施宜生

宜生字明望浦城人宣和末爲潁州教官仕齊仕金官至翰林學士自號三住老人有集行於世

金史宜生爲宋潁州教授以罪北走海陵召爲翰林直學士遷翰林侍講學士爲宋正旦使宜生自以得罪北走恥見宋人力辭不許宋命張燾館之都亭因問以首丘諷之宜生顧其介不在旁爲廋語曰今日北風甚勁又取几間筆扣之曰筆來筆來於是宋始傲其副使耶律闌離刺使還以聞坐是烹死先是宜生困於場屋遇僧善風鑑謂之曰子面有權骨

可公卿而視子身之毛皆逆上且覆腕必有以合乎此而後
可貴也宜生聞其言大喜竟從范汝爲於建劍已而汝爲敗
變服爲傭傭泰之吳翁家三年翁異之一日屏人詰其姓宜
生曰我服傭事唯謹主人乃亦寘疑耶翁固詰之則請其故
翁曰日者燕客執事咸餒而汝獨遜諸儕且撤器有歎聲是
以識汝非眞傭也宜生遂告之故翁贐之金夜濟淮以歸試
一日獲熊三十六賦擢第一其後竟如僧言

貴耳集施宜生改名方人也

癸辛雜識云汴梁普賢洞記石碑甚雅金皇統四年四月一
日奉議大夫行臺吏部郎中飛騎尉施宜生撰并書所謂方
人也者後爲金相字步驟東坡

闕題

久坐鄉關夢已迷
歸或投宿舊沙谿
一天風雨龍移穴
半夜林巒鳥擇棲
賣菜無人求好語
種瓜何地不成畦
男兒未老中原在
寄語鷗鷺莫浪啼

嚴子陵釣臺

懸崖斷壑少人蹤
只合先生臥此中
漢業已無一抔土
釣臺今日幾秋風

又

同學劉郎已冕旒
未應換與此羊裘
子雲到老不曉事
不信人間有許由

黃州弔東坡

文星落處天應泣此老已知吾道窮事業漫誇生仲達功名猶忌死
姚崇

題平沙落雁

江南江北八九月葭蘆伐盡洲渚闊欲下未下風悠揚影落寒潭三
兩行天涯是處有菰米如何偏愛來瀟湘

案全金詩闕首兩句而餘亦小異

感春詩

感事傷懷誰得知故園閒日自暉暉江南地暖先花發塞北天寒遲
雁歸夢裏江河依舊是眼前阡陌似疑非無愁只有雙蝴蝶解趁殘
紅作陣飛

錢王戰臺

層層樓閣捧昭回元是錢王舊戰臺山色不隨興廢去水聲長逐古今
來年光似月生還沒世事如花落又開多少英雄無處問夕陽行
客自徘徊

題都亭驛

江梅的皪未全開老倦無心上將臺人在江南望江北斷鴻聲裏送
潮來

晦庵詩話云龍泉尉施慶之常舉宜生十數詩內入使時題
都亭驛云云

案此詩見晦庵詩話又見耆舊續聞題係題將臺而首句江
梅的皪作梅花摘索末句作征鴻時送客愁來

題壁

君子雖窮道不窮人生自古有飄蓬文章筆下千堆錦志氣胸中萬丈虹大抵養龍須是海算來棲鳳莫非桐山東宰相山西將莫把前功論後功

耆舊續聞云施達字必達少負其才有詩名建炎間擢上第爲潁州教官秩滿而歸時范汝爲爲寇據建城執達而脅之令書旗幟遂陷賊黨朝廷命韓世忠討之城破乃捕達付軍帳至臨安府獄編隸湖外離家之日度此去必無生還乃囑其妻令改適其妻悲泣鬻奩具所有以給行囊及出獄賂防送卒使緩行買一獲自隨所至宿舍縱其通淫行至中途村舍一夕多市酒肉令恣飲中夜酣臥手刃二卒及婢乃變衣易姓名竄於淮甸滁黃間後朝廷捕之甚急達乃爲僧行入

邊界山寺中主僧疑其必非凡人一日以事役其徒衆使出
獨達在呼而問曰朝廷嚴賞捕亡命之人若是汝可以實告
我爲汝尋一生路脫去達感泣下拜悉露情悃僧作一書並
白金數兩贈之云可速入彼界尋某寺僧某投之達拜謝而
去遂至某寺暇日買北庭舉業習之易名宜生舉進士廷試
天子日射三十六熊賦云聖天子內敷文德外揚武功雲屯
一百萬騎日射三十六熊遂冠榜首仕金國爲中書舍人入
翰苑達小時嘗有詩云云又嚴子陵釣臺詩云云至黃州弔
東坡詩云云至一寺中爲僧題屏風八景其平沙落雁云云
此詩已有異志又感春詩云云又感錢王戰臺詩云云此詩
是出塞作又題將臺詩云云此詩奉使本朝時作又題壁云

云達嘗卜葬地卜者曰若裏葬三紀後可出侍從子孫綿遠
近前一紀窮困後方顯達但不歸家鄉達曰子孫富貴何預
於我卽從前葬韓蘄王之孫枝嘗語余云後見趙左史再可
云靖康之難有族人陷於北境葉倖者建甯人仕於南京亦
留金國達爲其子葉寮執伐娶趙後和好旣成金還河南地
於是陷金者皆得歸江南寮今爲雜賣場監官亦能言宜生
舊時事宜生祖墳今在邵武建甯縣村土人猶有能言其事
者

贈道人

休論道骨與仙風自許平生義與忠千古已嘗窺治亂一身何足計
窮通仰天只覺心如鐵覽鏡猶欣髮未蓬塵世紛紛千百輩只君雙

眼識英雄

夷堅志云邵武吳乳說其父頃當三舍時居軍學與郡士吳淑黃鑄施達同舍有道人者不知所從來雅擅人倫風鑒之譽四士共延致於齋閣見施達曰異哉君之相法也今未可宣言俟翌日無人時當來訪我如約而往則座上客滿矣次日復然第三日天未明過之道人執燭辨視徐問曰君有父母妻子乎曰赤立一身耳又問有叔伯兄弟宗族乎曰只有一叔在道人曰君面有反相鬚眉皆逆生他時決背畔不終臣節達大笑口占一詩贈之云云味其詞意崢嶸不律帖頗似張元所賦後卒降金躋顯秩

含笑花

百步清香透玉肌滿堂皓齒轉明眉
褰帷跛客相迎處射雉春風得意時

詩藪云楊用修詩話載施宜生含笑花詩云云讀者多不知
宜生何人案程史宜生福州人少遊鄉校不利有僧鑑其相
當大貴然毛皆逆生法必合此乃驗因從范汝爲敗入金金
主亮校獵國中一日獲熊三十六宜生獻賦有雲屯八百萬
騎日射三十六熊之語亮大喜擢第一驟拔至禮部尙書來
使宋漏亮南侵策歸而被烹其爲人蹤迹奇甚且於宋事有
關而史逸之故節錄於左詩亦頗佳

馬定國

定國字子卿荏平人唐中令周裔孫少日志趣不凡阜昌初

游歷下亭以詩撼齊王豫豫召與語大悅授監察御史仕至翰林學士初學詩未有入處夢其父與方寸白筆從是文章大進自號薺堂先生有集傳于世

句

蘇黃不作文章伯童蔡翻爲社稷臣

中州集題詩酒家壁有云云用是得罪亦用是得名

鮮于可

可字東父蜀嘉州人從祖仇父之武皆有名于時

句

小雨潤履綦花氣襲芳襟 十里青山堪布屐半篙春水已勝舟

中州集馬定國薺堂集載其師友六人其一鮮于可東父詩

有云云亦稱佳句

高鷗化

鷗化字圖南平原人少有能詩聲

句

盤中酒影金蛇活 流虹聚石缸

中州集馬定國薺堂集載其師友六人其一高鷗化如云云
皆奇怪不凡

王景徽

景徽字彥美祁國文獻公溥之後

贈定國

澗下松杉已蔽牛溪中蘋藻可供羞故鄉未有終焉計欲指吳山歸

去休

中州集馬定國薺堂集載其師友六人其一王景徽如贈定國云云

吳縝

縝字子長東平人文肅公奎之孫年三十以食貧暫仕卽歸隱于魚山狼溪之側

寄定國

情馳夏日流目斷晚雲碧新詩從何來遠自金馬客雄深作者意奔軼古人迹名高四海望髮未一莖白應嗤窮途士抽簪老泉石采蕨在南山驅牛向東陌勞生豈不苦衣食迫晨夕膏粱無宿懷茅茨得真適卒歲將何求一飽惟力穡

訪國城石氏

昔我訪君處樹涼炎暑收今君訪我來城空殘雪留經時少乘興兩
至皆空投茅茨隔溪上車馬度城頭不聞機杼聲但聽溪水流向來
方圓翁曾伴此中遊近聞大梁至京塵滿衣裘相思嬾歸步落日風
颼颼

山居

西首魚山崦北連黃石祠崇岡在東南我家山北陲地僻少人事終
朝掩柴扉尊酒不常得書卷聊自怡春風數日來處處生蕨薇寸心
復何累一飽良可期當年終南人捷徑以貽譏知我無心者豈顧悠
悠辭

擬淵明貧居

凄其歲云暮北風無時休晨興倦薪水夜寐乏衾裯缺月正褻回宿
鳥頻啁啾欲無憔悴歎奈此霜霰秋松楸脫兵火環堵且淹留閉門
念袁安守賤弔黔婁坐讀貧士詩吾乃淵明儔

溪上招王仲先

幽居復何爲冬來性成嬾柴門俯清溪寸步出亦罕今晨偶攜杖愛
此時日暖寓目隨所之行到南溪畔背陰雪猶積向暖水全泮搢頤
臥石上仰面蒼崖斷泉聲何從來乍喜兩耳換平分意甚遲斗落勢
方悍坐來百慮忘還惜日景短塵寰多憂虞中林足閒散故人戀明
時歸休苦遲緩幅巾來何時臨流話幽款

中州集馬定國薺堂集載其師友六人其一吳縝有各云云

金詩紀事卷五

侯官陳衍緝

吳激

激字彥高宋宰相栻之子使金以知名留之官翰林待制出知深州卒有東山集十卷并樂府行世

句

春風蜀棧青山盡曉日秦川綠樹平
煙拂雲梢留淡白雲蒸山腹
出深青
山侵平野高低樹水接晴空上下星
玉座煙霞春寂寂
石壇星斗夜蒼蒼
手版西山聊復爾角巾東第定何時
竹院鳴鐘疑物外畫橋流水似江南
數樹殘花喜春在一聲啼鳥覺山深
玉雪自知塵不浣丹青難寫酒微醺
四海蒼生謝安石一言宣

室賈長沙 海東絕域皇華使天上仙官碧落卿 江湖欹枕夢風雪打窗聲

中州集出散關詩云云愈甫索水墨以詩寄之云云三衢夜泊云云太清宮云云呈正甫云云遊南溪潭云云飛瀑巖云云詠鄭邱故伎云云送樂之侍郎云云送韓鳳閣使高麗云云偶題云云此類甚多樂府夜寒茅店不成眠南朝千古傷心事誰挽銀河等篇自當爲國朝第一而世俗獨取春從天上來謂不用他韻風流子取對屬之工豈真識之論哉

句

聚檐秋雨喧疏溜過竹春泉咽暗冰門巷蕭條三尺雪琴書寥落一龕燈

蔡松年詩槽聲同彥高賦云槽牀過竹春泉句自注云云彥高詩也

蔡松年

松年字伯堅行臺尙書省令史出身官至尙書右丞相卒諡文簡

中州集鎮陽別業有蕭閒堂自號蕭閒老人百年以來樂府推伯堅與吳彥高號吳蔡體

寄王仲侯

冰簾風簾千柱宮月華清浸雪芙蓉誰教涼馬三千里好在行雲第
幾峯酒市烏紗懷李白仙人鶴氅看王恭拍浮花裏知恩否寄與新
詩洗醉悰

自注有本事可發一笑

庚戌九日還自上都飲酒於西巖以野水竹閒清秋巖酒中綠

爲韻十首

雞羣媚稻梁老鶴日疎野人言隨其流故有不同者
骨相乃封侯銅腥能使鬼文章亦可憐不直一杯水
在昔安九鼎功名照帛竹貞觀用玄成一士天下足
憂國在肉食歛玉峨清班吾曹漫浪人合眼松雲間
閒居度重九昔賢愛嘉名霜菊有正色糟牀逢聖清
平生一丘壑晚墮法家流一點無俗物今年真好秋
謝公旣經世永懷東西巖翠袖亂清光輕雲點風鬢
我得秋風暇鱸魚一杯酒佳人發浩歌此樂真不朽

去年哦新詩小山黃菊中年年說秋思遠目驚高鴻
躋哉生處樂陵谷異風俗南枝吾永安笑撫西巖綠
明秀集毛澤民嘗九日以微疾不飲酒唯煎小團薦以菊葉
作侑茶樂府卒章有一杯菊葉小雲團滿眼蕭蕭松竹晚之
句僕頃在汴梁三年每約會心二三客登故苑之友雲亭或
寓居之西巖置酒高會以酬佳節酣觴賦詩道早退閒居之
樂歲在庚子有五字十章其一云去年哦新詩小山黃菊中
年年說歸思遠目驚高鴻逮今已復三經是日奔走塵泥勞
生愈甚今歲先入都門意謂得與平生故人共一笑之樂且
辱子文兄有同醉佳招而前此二日左目忽病昏翳不復敢
近酒盞癡坐無聊感念身世無以自遣乃用澤民故事擬菊

烹茶仍作長短句以石州之音歌之

姚孝錫

孝錫字仲純豐縣人宋政和四年登第官代州兵曹金兵入就注五臺簿

句

節物後先南北異人情冷暖古今同
紅纈退風花著子綠鍼浮水
稻抽秧久客交情諳冷暖衰年病骨識陰晴
烟染綠絲迷別浦
雨催紅糝綴長條愁邊日晷偏疑短夢裏江鄉未當歸
盤無兼
味慙留客夢厭多歧不到鄉
酒敵餘威翻索莫詩含幽思倍清新
岸漲魚吹沫山空石轉雷
舞風初學絮帶雨不成花
谷虛繁
地籟境寂散天香
雲生古木千章秀山抱晴川一掌平
詩忙疎

酒醅俸薄減廚煙 玄晏暮年常抱病子山終日苦思歸

中州集政和四年登科調代州兵曹國朝兵入雁門州將議
以城降官屬恒怯投死無所仲純投床大鼾略不以爲意帥
府就注五臺簿未幾移疾去因家五臺善治生亭榭場圃富
於遊觀賓客日盈其門州境歲饑出家所藏粟萬石賑貧乏
多所全濟鄉人德之中年之後以家事付諸子放浪山水間
詩酒自娛醉軒其自號也資稟簡重喜怒不形于色棄官時
年二十九至八十三乃終喪亂以來止存律詩五卷而已今
略載於此次冠卿韻云云次趙獻之韻云云溪墅早春云云
春日 and 德充云云新詩云云賦雪云云雨云云雪云云峯山
寺云云懷士會云云感懷云云古詩尤有高趣恨不得復見

矣

案孝錫官兵曹城破不去還注五臺簿並不堅拒暫就乃去
又終居金地不能不歸金人矣宋詩紀事收之似與宇文太
學之被族於金者不同也

晁會

會字公錫高平人宋宣和末武舉官太子洗馬金天眷二年
經義進士官至興平軍節度副使

句

官況薄於重榨酒瓜期近似欲殘碁 煙藏芳樹遠雲補斷山齊

中州集歷虞鄉猗氏臨晉三縣令詩號泫水集虞鄉縣齋云
云王官谷云云鄉人至今傳之

李晏

晏字致美高平人皇統二年經義進士官至昭毅軍節度使

白巖山 二首

只有山光無水聲我疑神物固巖扃如何鑿得飛泉出當爲山僧叱
六丁

山寺尋春春已歸紫梅猶有折殘枝老僧兀坐如枯木花謝花開總
不知

自註白巖寺羣山環抱村落相望亦奇觀也惜乎無水因作
絕句書石應有水出

朱自牧

自牧字好謙棣州厭次人皇統中南選登科大定初同知晉

寧軍事

句

寒天展碧供飛鳥
落日留紅與斷霞
水禽孤影白霜果
半窗紅海氣升孤月
巖姿起暝煙
山雪尋崖轉林煙
逐樹低燈殘星在
壁霜重水漫衾

中州集有詩各云云句法之工類如此

董師中

師中字紹祖邯鄲人後徙洛州皇統九年進士官至右丞有

漳州集

中州集有燕賜邊部詩傳於世

金史師中乞致仕詔賜宅一區留居京師以寒食乞過家上

家許之且命賦寒食過家上冢詩

自臨洮還

臨潭仍是漢家城積石相望十驛程西略河源東並海此身何地不
經行

中州集漢家城在臨潭羌人所稱紹祖之孫濟剛記此詩末
句又作塵埃風雨歎勞生

鄭子聃

子聃字景純大定人天德二年登科官侍講學士

句

玉斧無人解修月珠裙有意欲留仙

中州集賦醑醺有云云之句甚爲詩家所稱

劉瞻

瞻字巖老亳州人天德三年南榜登科大定初召爲史館編修自號櫻寧居士

句

廚香吹豆角井臭落椿花

中州集党承旨世傑酈著作元與魏內翰飛卿皆賞之學作詩工於野逸如云云

劉汲

汲字伯深天德三年進士入翰林爲供奉自號西巖老人

西岩歌

西岩逸人以天爲衢兮地爲席茵青山爲家兮流水爲之朋飢食芝

兮渴飲泉又何必有肉如林兮有酒如澠世閒清境端爲吾輩設吾
徒豈爲禮法繩少文援琴衆山響太白弄月清波澄人閒行路是處
多炎蒸何如水前山後六月赤腳踏層冰

題西岩

卜築西巖最可人青山爲屋水爲隣身將隱矣文何用人不知之味
更眞自古交游少同志到頭聲利不關身清泉便當如澠酒澆盡胸
中累劫塵

湓水集南山翁子伯深西岩歌置之古人集中誰能辨之所
謂不拘禮法如晉之狂士公未及五紀致政臨終不亂蓋有
道者公又有詩云云尤可諷咏

王寂

寂字元老薊州玉田人天德三年進士官至中都路轉運使
諡文肅有拙軒集

覺華島

并引

予自少時卽聞遼東覺華島爲人間佳絕處凡道經海上未
嘗不駐鞍極望久不能去第簡書有期不得一到爲恨大定
乙未之秋仲月十有四日予自白霄審理冤獄歸投宿龍宮
下院謀老宿期一往焉老宿曰今秋風勁波浪洶湧雖舵工
篙師往來其間亦不免縮頸汗背當俟隆冬冰合如履平地
然後可著鞭耳予竟不聽明日登舟行未幾半風濤掀簸舟
人爲之變色於是收帆弭楫維石於北渡予歎曰此而不濟
則命也迺割牲釃酒投是詩以禱之遂復鼓枻以進已風停

浪靜天水湛然極目萬里恍然如坐大圓鏡中指顧之間已
登彼岸舟僧大德者謂予曰正直動山鬼詩句起蟄龍者信
不誣矣予笑曰如二公者千古仰之猶太山北斗豈庸人末
士所可擬哉是必憐其勤而報以誠也不然則劉昆所謂反
風滅火蝗不入境者皆偶然耳雖然此一段奇亦不可不紀
也

宮亭湖神感且通往來送客能分風廣德王祠禱輒應重樓翠阜浮
霜空我行擬上覺華島香火遍走青蓮宮中流未濟成齟齬船頭西
向旗脚東雲奔霧湧白浪捲一葉掀舞洪濤中平生止行類如此憑
仗願有信與忠嘗聞主海尊位置顧豈變化難爲功指呼蛟蜃掃陰
翳天水萬里磨青銅解維轉舵飽帆腹雙槳不舉追驚鴻茲遊政要

儻素願勿使坐歎詩人窮投文再拜瀝微懇爲我寄語白龍翁

拙軒集

挽姚仲純

夫子人之傑魁然道最純鄉閭連沛邑族系出虞賓清節冰壺瑩孤
標玉樹新妙齡探桂窟雅志傲蒲輪事業傳衣鉢風流表縉紳斗南
惟此老月旦復誰人忍死哭亡社偷安笑具臣斯文雖未喪吾道竟
難伸彭澤不書宋東陵無負秦直從強健日收得自由身把臂言猶
在回頭迹已陳發書占賈鵬絕筆感商麟去矣騎箕尾嗟哉厄已辰
終天從此別窮壤向誰親墮柳逢王果留燈待沈彬彭殤俱逝水孔
跖共荒榛書帶緣新壠笛聲起舊隣絕絃雙墮淚挂劍一傷神冢樹
悲長夜山花作好春龜趺平木杪誰爲寫光塵

拙軒集原注案此詩附載中州集醉軒姚先生孝錫傳後繹

後半首語似過墓下之作

詠張宮師二疏東歸圖

戰國事縱橫廉隅初滅裂強羸灰六籍名教寢衰歇卯金新典禮蠹
簡訪遺缺人材就教育士檢敦修潔賢哉二大夫夢覺槐安穴

案槐安國

爲唐時故實不應引用謹附訂於此

功名我何有劒首吹一呖約日俱移疾乞身良勇決

兩宮贐黃金恩遇顧不褻送車數百兩祖帳都門訣冥鴻謝贈繳天
馬落羈縲倒囊促供具賓族相娛悅父子以壽終

案本傳父子字乃承上文兄子而言此摘

用未明併附訂於此

名聲日星揭人誰不學步卒莫踐其說寥闐魏晉後得一

陶靖節平生腰骨硬肯向督郵折後世無問津風流冷于鐵龍眠以
畫隱游意睇往哲嗚呼紙上影生氣猶凜冽宮師廊廟具天爲蒼生
設莫襲異姓封長揖稷與契云何眷短幅摸索墨漫滅況爲山九仞

一簣功可輟盍睇鳳巢閣姑置鷗歃血方將薦廟堂微公孰麴蘖致
君堯舜上鐘鼎載勳烈歸艇渺烟波晴樓醉松雪古今雖異時出處
同一轍款圖幸不惡蚤計正恐拙兩疏儻有靈抵掌冠纓絕

拙軒集原注案畫史會要金太子少師張汝霖善畫圖當卽
所作

至新蔡寓居開元寺暇日與文伯起登經樓賦詩

案文伯起名商
見趙秉文盜水

集寺壁舊有秦少游題詠計其年尙少于此作學官當時坡谷

鉅公皆推重意爲遠到而竟不然所謂方行萬里出門車折軸
惜哉

往昔秦郎妙天下淹留嘗倚仲宣樓長材不用虎爲鼠塌翼竟從蝸
與鳩夭矯飛雲蛻仙骨連卷雌霓落牆頭世間玉人豈復有應與晁

張地下遊

送張仲謀使三韓

照海旌幢出樂浪過家上塚路生光
鴨江桃葉朝迎渡岳嶺松花夜
煑湯恩詔肅將芝檢重醉鞭低裊
玉鞘長遺民笑指天車道酷似南
陽異姓王

拙軒集原注高麗稱中原使節皆曰天車某官事見閻子秀
鴨江行記

案張仲謀名汝猷浩之子金史無傳此詩送其奉使高麗而
作然交聘表不載其事

題高解元所藏武元直山水

洞清宗元不傳法此老無乃得之心
妙畫通靈恐仙去須防風雨夜

堂侵斯人地下骨應朽此畫世間寧復有莫與紛紛俗眼看等閒却作丹青手

拙軒集原注案武元直字善夫明昌中名士善畫見畫史會要

三殿

珠襦適足賈身禍金盃傳聞落世閒慚愧漢文遺治命瓦棺深葬霸陵山

王寂拙軒集慶州北山之麓遼山陵在焉俗謂之三殿二十年前常爲盜發所得不貲是所謂厚葬以致寇者歎而成詩

涿郡先主廟

當年竹馬戲兒曹笑指樓桑五丈高故國神游得無恨壞垣風雨夜

蕭騷

句

生涯貧到骨家具少於車
殘夢關河鼃禁月舊遊燈火馬行春
五年風雪黃州閨萬里關河渭水秋

中州集有北遷錄傳於世元老專於詩有云云元夕感懷云
云留別郭熙民云云與涿郡先主廟詩人共傳之

句

南臺故址今頽然漢盧植墓疑相傳

長安客話涿州境東南有漢盧植墓土人呼爲南臺金王寂
詩云云

邊元鼎

元鼎字德舉豐州人天德三年第進士供奉翰林

句

雲鐘號曉月風絮亂春燈
晚照入簾如有意春風過水略無痕
五更好夢經年事三月殘花一夜風
雲露月華天半白星移河漢
夜微涼

中州集詩文有高意時輩少及如各云云此類甚多

趙述

述字勉叔高平人承安二年登科

句

奇貨可居天種玉太平有象麥連雲

中州集趙可字獻之風流有文采詩樂府號玉壺散人集子

勉叔賦雪云云屏山故人外傳說勉叔詩章字畫皆有父風

孔彥舟

彥舟字巨濟相州林慮人

金史亡命爲盜後走之齊從劉麟伐宋齊國廢從宗弼取河
南累官工兵部尙書封廣平郡王正隆改南京留守

句

苦被杜鵑頻喚著參差兵馬過衡陽

三朝北盟會編彥舟在潭州屢敗於馬友乃退去欲向南行
因作口號有云云之句

高公振

公振字特夫正隆初進士官密州刺史

句

翠蓋紅粧無俗韻綠陰青子更多情

中州集詩有家學賦南園江鄉有云云之句惜不多見

任詢

詢字君謨號南麓易州人正隆二年進士官泰州節廳

句

種竹六七箇結茅三四間稍通溪上路不礙屋頭山黃葉水清淺白
雲風往還水邊團月翻歌扇風裏垂楊學舞腰林邊鳥語月微
下竹裏花飛春又深

中州集平生詩數千首歿後皆散失如山居云云春晚云云

南郊小隱云云前輩喜稱道云

郝俛

俛字子玉太原人正隆二年進士官至河東北路轉運使

句

勞生雖可厭清景亦自適

中州集殊有古意

杜侔

侔字真卿武功人阜昌中登科

馬嵬道中

垂柳陰陰水拍堤春晴茅屋燕爭泥海棠正好東風惡狼藉殘紅送馬蹄

中州集兒時嘗作藥名詩有杜仲吾家好弟兄自然同姓又

同名之句及五言百韻上乾州通判馬涓涓大加賞異阜昌
中登科蒞官亦有聲馬嵬太真墓過客多題其詩甚多道陵
詔錄其詩得五百餘首付詞臣第之真卿詩在高等舊有錦
溪集亂後不復見矣子師楊能詩尤工書翰奉天楊煥然云
然

劉仲伊

仲伊字致君蓋州人後遷沃州正隆二年進士官至都水監
丞有龍山集

歸潛志號龍山李欽叔外甥也能詩學江西諸公有梅影詩
云云

墨梅

高髻長眉滿漢宮君王圖上按春風龍沙萬里王家女不著黃金買畫工

五換鄰鐘三唱雞雲昏月淡正低迷風簾不著闌干角瞥見傷春背面唬

溥南詩話近世士大夫有以墨梅詩傳于時者其一云云其一云云予嘗誦之於人而問其詠何物莫有得其彷彿者告以其題猶惑也尙不知爲花况知其爲梅又知其爲畫哉自賦詩不必此詩之論興作者誤認而過求之其弊遂至於此案前首爲仲伊墨梅絕句十首之第八首次句爲仲伊梅影詩第二句歸潛志作小樓天淡月平西

又案溥南論詩過於拘謹詩貴有寄託切自己身分徒工於

YORK UNIVERSITY

JUN 5 - 2001

EAST ASIAN STUDIES

賦物則應試之作與事類賦所詠於己何與哉必如潯南說
陸魯望之無情有恨陳簡齋之前身相馬姜白石之不慣胡
沙亦何必其爲白蓮墨梅梅花哉

